



EDITORIAL

Desperado nga mga atake ha katawhan han natikaluya nga rehimen

NAKIT-AN HINI NGA Pebrero an mas mapintas nga mga atake ha katawhan han mga pasista nga pwersa han rehimen US-Duterte. Padayon nga nakapriso pa an tulo ha "Tacloban 5," mga aktibista nga ilegal nga gin-aresto ngan gindetiner hadton Pebrero 7 tungod han ha hinimu-himo nga mga kaso nga pagtago kuno han mga pusil, bala ngan eksplosibo (nga gintanum han pulis) ha ira upisina. Ha Northern Samar, padayon nga nalasurbo an mga Retooled Community Support Program (ginpadayon nga PDT) ngan iba pa nga operasyon militar. Naato ngan nagpakita han pagdiri an mga parag-uma pinaagi han ebakwasyon ha mga baryo nga gin-ookupar han militar, nga natalapas ha internasyunal nga makatawo nga balaud.

Kundi, an kamadarahug han rehimen panigamnan diri han kusog kundi han natikaluya hini nga poder. Nahihimulag ha katawhan hi Duterte, nga poyde liwat mamatay tungod han damo nga gin-aabat nga sakit. Natika-

pintas an sumpakiay tungod han makaiya nga mga interes ha giutan han mga naghahadi nga klase ngan ha sakob mismo han naghahadi nga pakasyon. May mga heneral nga maka-US nga nadiri ha mga yakan ni Duterte kontra ha US, ngan andam sundon an amo nga imperyalista ha takna nga dumiri na ini kan Duterte.

An usa nga mabangis nga mananap pinakadelikado kun tipatay na ini. Kinahanglan han dugang nga kaisog agud atubangan an pasista nga panmuypoy han rehimen US-Duterte. Kinahanglan tumindog an masa nga parag-uma kontra ha panlasurbo han militarisan ha kabaryuhan. Kinahanglan mainsister han ligal nga demokratiko nga kagiusan an mga katungod hini. Ha maisugon nga pag-ato han ngatanan nga porma han pakigbisog ngan ha pagpadig-on ha ira ranggo, makakasiguro an katawhan nga mapaluya ngan mapabagsak hi Duterte ngan maipasulong an nasyunal demokratiko nga rebolusyon. ■

Mamamahayag ngan mga aktibista, ilegal nga gin-aresto

GINTAMNAN HAN EBIDENSYA ngan ilegal nga gin-aresto han ginkumbinar nga pwersa han militar ngan pulisya an usa nga progresibo nga mamamahayag ngan upat nga aktibista ha magkadungan nga reyde ha ira mga upisina ha Tacloban City hadton Pebrero 7 dapit alas-2:30 han kaagahon.

Ginreyd han 150 nga sundalo ngan pulis an upisina han Bagong Alyansang Makabayan-Eastern Visayas (BAYAN-EV) ngan Katungod-Sinirangan Bisayas (Katungod-SB) ha Brgy. 77 kun diin gin-aresto hira Mira Legion, istap han BAYAN-EV; Alexander Abinguna, tagapagyakan han Katungod-SB ngan Marissa Cabaljao, tagapagyakan han People Surge, upod an iya uno anyos nga puya.

Kadungan naman nga ginreyd ngan gin-aresto ha Brgy. 69 hira Frenchie Mae Cumpio, progresibo nga mamamahayag han alternatibo nga mantalaan nga Eastern Vista ngan *anchor* han programa ha radyo nga Lingganay han Kamatuoran; ngan Mariel Domequil, istap han Rural Missionaries of the Philippines.

Gindara an gin-ngaranan nga "Tacloban 5" ngan an puya ni Cabaljao ha PNP Regional Office ha Palo, Leyte. Temporaryo nga nakagpiyansa hira Legion ngan Cabaljao samtang nakapriso gihapon hira Cumpio, Abinguna ngan Domequil.

Sigon ha 8th Infantry Division-Philippine Army, ginreyd an mga upisina tungod kay mga "safehouse" kuno ini han rebolusyunaryo nga kagiusan. Nakuha kuno liwat nira an pira nga armas ngan paburuthon kalakip an usa nga masinggan, mga pistola, ngan granada ha mga lamesa ngan higdaan.

Kundi usa kaadlaw antes an mga

"Mamamahayag...", *sundan ha paypay 2*

Operasyon "dumog" han militar ha Northern Samar

TAGDAGKO NGA OPERASYON "dumog" nga may ilegal nga pangaresto, pan-gigipit ngan pwersahay nga pagpasurrender an ginbuhat han mga pwersa han militar kontra ha mga residente han duha nga baryo ha Northern Samar hini nga Enero ngan Pebrero.


Ha bungto han Palapag, gintatantiya nga 120 nga sundalo han 20th IB ha pangunguna han usa nga "Lt. Lawrence" an nagpupisyon ha entrada han Sityo Canonghan, Brgy. Osmeña, hadton Enero 19 dapit alas-4 han kaagahon. Pagkaaga, ilegal nira nga ginrekisa an duha nga balay han parag-uma ngan ginpugngan an mga taghimaryo nga gumawas ha sityo.

Kahuman hini, gintirok han mga sundalo an mga residente para ha usa nga asembleya agud piriton hira nga sumurender komo kaapi han Bagong Hukbong Bayan. Dapit alas-10 han aga, ginpusil han mga pwersa han BHB an mga sundalo nga nakaposte ha gawas han sityo. Duha nga sundalo an kumpirmado nga napatay.

Kinabuwasan, dudrungan nga nag-ebakwet an mga taga-sityo ngan karaknit nga barangay komo protesta ha pangigipit han militar.

Antes pa han operasyon, nagkagikan na an mga residente nga hadto pa target dakpon han mga sundalo. Tungod kay napakyas ha ira katuyuanan, arbitraryo nga gin-aresto han mga sundalo an upat nga sibilyan nga taga-Sityo Canonghan hadton Enero 23. Hini nga Enero 27, waray na nakit-an nga sundalo ha lugar.

Ha bungto han Mapanas, ginsulod ngan ginpupisyonan liwat han maabot 50 nga sundalo an entrada han Brgy. San Jose hadton Pebrero 9, alas-4 han kaagahon. Kabulig an usa nga ahente militar nga hi Renay, gintirok nira an mga tagabaryo ngan patag-usa nga gintawag an mga ginpasurrender nira komo kaapi han BHB. Nagsaad an militar han mga "benepisyo" sugad han P50,000 para ha pagsurrender, P5,000 para ha pagkaon, P450,000 para ha pa-



balay, ngan P100,000 para ha panginabuhi.

Nadugngan pa an mga sundalo pagkabuwas ngan utro nira nga gintirok an mga residente para ha usa nga miting. Udto han Pebrero 11 hin pabuthan han mga pwersa han BHB an kaaway ha sakob han baryo. Labaw pa nga nagin madarahug an mga sundalo kun diin pipirala nga taghimaryo an gintutugutan nga makagawas hin may talaan nga panahon, ginlilista an ira mga ngaran ngan ginhalikwat an ira mga gamit.

Antes an operasyon, talwas na nga nakaatras an mga taghimaryo nga hadto pa ginlalanat han kaaway. ■

"Mamamahayag...", sundan ha paypay 2

reyd, naghangyo an Katungod-SB ha Commission on Human Rights nga inspeksyunon an ira mga upisina agud pamatud-an nga waray armas nga nakatago dinhi. Kahuman ini makakarawat an Katungod-SB han sumat hadton Pebrero 1 nga posible nga ireyd an ira mga upisina. Pira kabulan na liwat nga gin-susundan han mga aset han militar an mga gin-aresto nga aktibista.

Ha imbestigasyon han *fact-finding team* kalakip an mga kongresista tikang ha grupo nga Makabayan, ginpagawas han kwarto ngan pwersahay nga ginpaluhod an mga gin-aresto antes sumakob an *raiding team* agud magtanum han ebisdensya ha upisina.

Hiluagan nga pagkunderan tikang ha mga lokal, nasyunal ngan internasyunal nga organisasyon ngan persanohe an gin-ani han mga pwersa han estado tungod ha madarahug hini nga pag-aresto ngan pagsalawad han hinimu-himo nga kaso kontra ha mga aktibista. Sigon ha National Union of Journalists of the Philippines, ini nga tinagdamo nga pangaresto kaparte han "crackdown" han rehimen Duterte diri la ha mga ginpapakaraut nga "komunista nga prente" kundi sugad liwat ha kritikal nga midya.

Padayon nga nananawagan an ira mga tagsuporta nga pagawson na an ngatanan nga Tacloban 5. ■

I ♥ NPA! NPA ♥ you!

KOMO PANGANDAM PARA ha ika-51 katuig nga anibersaryo han BHB, gintikangan han mga rebolusyonaryo nga pwersa ha bug-os nga nasud an dirudilain nga aktibidad nga may tema nga "I love the NPA! NPA loves you!" hini nga Pebrero 14.

Ha usa nga bidyo nga ginpagawas han Sine Proletaryo hiton nga adlaw, ginpaabot ni Ka Oris, tagapagyakan han BHB-National Operations Command (NOC), an "walang maliw na pagmamahal ng buong New People's Army sa sambayanang Pilipino."

"Pinili ng NPA ang buhay ng sakripisyo sa hangaring makitang lumaya ang masa sa paghihirap, pagdurusa at gutom, lumaya mula sa pang-aapi at pagsasamantala" han mga naghahadi nga klase, sering ni Ka Oris.

Gin-aaghat han *Larab* an mga mambarasa hini nga magsubmiter han ira mga amot nga piktyur, drowing, luwa, kanta o surat nga naglaladawan han ira paghigugma ha hukbo han katawhan. Poyde ini igpadara ha pinakahirani nga sanga han Partido o yunit han BHB, o *i-post* ha *social media* nga may nakasurat nga #ILoveTheNPA. ■